

ETOP EMI ENODE ESOK MKPARAWA

Ecclesiastes 11:9, 10; 12:1-14

QYQHỌ UKPEP-ŊKPỌ 378

Eke Mkparawa

IKỌ IBUOT: “Bak Abasi nyuñ nim mbet esie: koro emi edi eke kpukpru owo” (Ecclesiastes 12:13).

Ọkwọrọ-ikọ

“Nyom ndidunore ke idem mi ntim mfiok,” edi ikọ emi isikopde ediwak mkparawa ewakde nditiñ. Ntre mmọ inyimeke ndibọ item mme ọkwọrọ-ikọ, mme andikpep ke Usen Ọbọñ, mme anam-utom Abasi ye mme ete ye eka mmọ; ndien mmọ emek usuñ idem mmọ, enyuñ edomo ndiyom idaresit ye uyuhọ ke mme ikpikpu inemesit ñkpọ uwem emi.

Ke ñwed Ecclesiastes emi edionode ñko nte “Ọkwọrọ-ikọ,” imokut ukwọrọ-ikọ emi ọkwọrọ-ikọ emi ọkọfiokde ñkpọ akan kpukpru owo ọkọkwọrọde. Ọkwọrọ-ikọ oro ama oduri mkparawa iren ye iban uton ete ke usen kiet Abasi eyeda kpukpru mme anam ukwañ ido edi ikpe. Enye onyuñ etiñ onọ mkparawa ete edara ke uyen mmọ, edi etim ekpeme ndinam se inemde Abasi esit. Midighe ntre, yak mmọ efiok ete “ke Abasi edikot fi edi ikpe abañ kpukpru ñkpọ emi.”

Idomo

Mmọ emi minyeneke erinyaña ikemeke ndinyene odudu ndikan ke idomo. Mmọ eduọ eduk ke se mmọ ekpekerede ete edi ñkpọ inemesit emi idiok miduhe ke esit, ndien idibighike mmọ ekut idem mmọ nte enamde mme idiok-ñkpọ eke okponde akan. “Idomo iduọ osim kpukpru owo ke adañemi idiok udon atapde enye odudi. Ekem idiok udon ama oyomo, aman idiok-ñkpọ; idiok-ñkpọ ama ọkọkọri osioño mkpa” (James 1:14, 15).

Satan ekeme ndidomo fi man etiene aka mme ufok uwut-ndise (cinema), ọbọ esikon (cigarette) efip inua kiet kpọt, midighe ntre anam mme idiok-ñkpọ eken. Edieke Iyip Jesus mikarake esit fo, emekeme ndiduọ nduk ke esit, ndien Satan ama ada uwem fo, afo unyuñ ukemeke aba ndikara idem fo, edi ke asaña aka nsinsi nsobo.

Utọ Ye Ukpeñe

Ini kiet owo ama okut nte mfri oat kiet otibede onyuñ ọkọride, ntre ama ọtọ mkpasip emi onyuñ ese nte enye ọkọride ọwọrọ. Enye onyuñ oduri etuek oat oro abat mme mkpasip esie. Mkpasip 800 ekedu ke esit mfri oro. Ndien enye ekere ete ke edieke itode mkpasip 800 oro ke ini ndaeyo, ama ekem, ke ini ukwọ iyenyene udomo ñkpọ 40. Edieke etode udomo ñkpọ 40 emi, iyenyene ñkpọ nte udomo ñkpọ 1,600. Ndien edieke iditode udomo ñkpọ 1,600 emi, idibighike ofuri ererimbot eyeyohọ ye oat emi okotode idem mkpasip kiet.

Akanam nte afo emekere abañ ini kiet ko, ke iñwañ Eden, ke tosin isua itiokiet emi ekebede, nte Adam ye Eve eketode ekpri mkpasip idiok-ñkpọ, ndien enye ọkọri onyuñ ọtọ tutu idiok-ñkpọ ye ukut eyohọ ofuri ererimbot mfin emi? “Se ededi owo ọtode, oro ke enye edinyuñ ọdọk” (Ñwed Mbon Galatia 6:7).

Ndifre Abasi

Edi ndisime ndika iso ndu uwem nte ñkpọ eke ikutde mfin edide ñkukure akpan ñkpọ. Edi akpanikọ ete ke ini uyen nnyin emi mfina miwakke ekeme ndidi mme mfon-ñkan usen nnyin. Kpa ye oro, Solomon, ọkwọrọ-ikọ, etiñ ete ke ifonke ndida ofuri ini uyen nnyin mbiat ke inemesit obukidem. Solomon etiñ ete, ana nte iti Andibot nnyin ke ini idide mkparawa.

Eduñore efiok ete ke nditọ-ọwọñ itiaba ke otu itiaita esiwọrọ ekpon ufok Abasi enyuñ etre ndiduk ke ukpep-ñkpọ Usen Ọbọñ mbemiso mmọ esim isua 15. Mme ekpep-ñwed etiñ ete ke nditọ-ọwọñ ọtọñode ke isua 9 tutu osim isua 12 ewut akamba nnyek-idem, ekop ndik ye mme mfina ekan nte ekedide ke mme usen edem. Ñwed mbuk ñkpọ-ntibe etiñ ete ke nditọ-ọwọñ esinam mme idiok-ñkpọ eke enyenede ndik eti-eti;

nsõn-ibuot ke otu nditõ-õwõn akabare edi akpan mfina idahemi. Ke mme usen eke mibighike, owo kiet emi ewetde mbuk õnõ New York Times, ama etiñ abañã idaha edu uwem ke Obio America ete “Etie nte baba owo kiet ifiõkke usuñ ye ntak nte ñkpo etiede, edi otuk kpukpru owo ke esit ndifiõk nte ke odu ebiet emi mfina odude.”

Edi akpanikõ ke mfina odu. Mme owo ekpenyene nditi Andibot mmõ ke ini uyen mmõ, eyom Jehovah, enyuñ ebõ erifen ke mme idiõk-ñkpo; ndien eyom enyuñ enyene edisana esit, emi ediõnõde nte Edinam-asana. Ñko, akpana nte mkparawa iren ye iban eyom Abasi, enyuñ ebõ mme enõ-mfõn Esie ye Uduõk-mmõn Edisana Spirit esin ke uwem mmõ. Ndien ke õkpoõn akam ye edikot ñwed Abasi, mmõ ekpekeme ndidu eti uwem anditiene-Christ eke enende ye ndiñwam mmõ efen ndinyene erinyaña.

Solomon ama õfiõk se enye eketiñde abañã, ke ini enye õkõnõde etop emi esõk mkparawa, ndien mme ikõ esie ekedi se odudu Edisana Spirit akadade enye usuñ. Kpukpru mkparawa, iren ye iban eyenam nte õfõnde edieke mmõ enamde item emi. Solomon ekedi ata owo inyene, onyuñ obon ediwak ñkpo uwem emi õnõ idem esie. Enye ama okop inemesit ke mbre, onyuñ enyene ukpono ye inyene. Enye ñko ekenyene se ifõnde ikan ke uwem emi, edi ke utit uwem esie enye ama okut mmõ nte edide ikpikpu ye ukpõk. Ifiõk esie ye odudu, ye etop ubõn esie ema ekpon eti-eti ke ofuri iso isoñ; kpa ye oro, enye eneñere õfiõk ete ke udori baba kiet iduhe, edieke owo edidiade ofuri ererimbot, ndien ada uwem esie osio isop; ñko ñkpo inyuñ iduhe eke owo edinõde ke ibuot uwem esie (Matthew 16:26).

Ini Uyen Ye Ini Usõn

Ntak kiet emi anade nte mkparawa ebak eyom Abasi ke uwem mmõ edi man mmõ ekpenam ñkpo enõ Obõn, enyuñ eda odudu ini uyen oro enam utom Esie. Nte owo õõnõde onyuñ õõnõde ndikop mmemidem, ubõk esie ediwak ini esinyenyek—“mme andikpeme-ufõk edinyekde”; enye ekeme ndidõnõ; onyuñ õnuhõ oto ke ntak õkpoõn utom ediwak isua, “Mkpoõn owo edinuhõde,” mme edet esie ekeme ndibehe, “Mbon õkõk enyuñ edopde, koro mmõ ekabarede edi esisit,” enyin esie ekabare ekpa mba, ndusuk enye akabare edi nnan, “ndien mmõ eke etiede ke window enyuñõ, ekim.” Ediwak ini mme ikpo owo esiyom ñkpo eke ediñwamde mmõ ndikop ñkpo õfõn, ye mme umõnõ-enyin, esañ, ye eto eke eñwamde mmõ ndisaña, ye edet eke midighe ata edet man ekeme ndiñwam ke mme ukut mmõ. (Se Ecclesiastes 12:3).

Utit Ofuri Ñkpo

Ndusuk ini Solomon ama okop ekpri mmem-idem ke enye ama õkõkwõrõ ikõ esie ama, ekeme ndidi enye ama okop ndik ete ke mme owo eyede edieke idikade iso ke anyan ukwõrõ-ikõ. Ke akpatre enye ete “erinam ediwak ñwed inyeneke erikure; erikpep ñkaha onyuñ esin idem akpa mba.” Usuñ eke õfõnde akan mkparawa nditiene edi nditi Andibot mmõ, ndiyak esit mmõ nnoAbasi ke ndo-ndo oro mmõ ekopde ikot Spirit. Baba owo kiet ikprike ikan nte okpoyomde Abasi.

Akpatre mme ufañ ukwõrõ-ikõ emi eyefõn ye kpukpru mkparawa eren ye iban, ñko ye kpukpru iren ye iban ekededi emi edidade mmõ esin ke ibuot, koro mmõ ekamade ukpõhõre nsinsi uwem.

“Yak nnyin ikop utit ofuri ñkpo emi; bak Abasi, nyuñ nim mbet Esie: koro emi edi eke kpukpru owo. Koro Abasi eyekot kpukpru ñkpo emi enamde edi ikpe, õkõrõ ke kpukpru ndibe-ndibe ñkpo, edide eti, enyuñ edide mme idiõk” (Ecclesiastes 12:13, 14).

MME MBUME

- 1 Nso idi enyiñ efen emi ekotde ñwed Ecclesiastes?
- 2 Edõhõ ete ini uyen ye ini akparawa õwõrõ nso?
- 3 Anie ke nnyin ikpeti ke ini nnyin idide mkparawa? Nso idi enyiñ efen emi enõde Enye?
- 4 Ekeda nso ebõ ikpõhidem nnyin ke eritõnõ?
- 5 Da akpatre ufañ iba ke ñwed Ecclesiastes nte ikõ ibuot.
- 6 Nso idi ntak emi mkparawa iren ye iban ekpeyomde Abasi ke ini uyen mmõ?
- 7 Nõ ufõn duop emi anditiene-Christ enyenede akan anam-idiõk.
- 8 Nso edidi utit uwem anditiene-Christ? Ye eke anam-idiõk?
- 9 Nso idi ntak emi edidoride mkparawa udori ke nditi Andibot mmõ?